

मार्निंग डोगरी न्यूज़ बुलेटिन, समें. 09-20 Hrs



Headlines

- प्रधानमंत्री नरेन्द्र मोदी होर अज्ज मुंबई च केई विकास परियोजनाएं गी शुरू करोआंगन ते केई परियोजनाएं दे नीह पत्थर बी रकखगंन।
- सरकार हर ब'रे 25 जून गी संविधान हत्या दिवस दे रूपे च मनाग।
- जम्मू थमां 4 ज्हार 669 श्री अमरनाथ श्रद्धालुएं दा इक होर जत्था अज्ज सख्त सुरक्षा बंदोबस्तें हेठ घाटी लेई रवाना होआ।
- अनंतनाग च स्थित मते प्राचीन मंदरें चा इक गी 34एं ब'रें परैंत फही खोलेआ जा'रदा ऐ।
- फौज दी 16 कोर दे जीओसी होरें कब्जा रेखा कन्नै लगदे इलाकें च बने दे सुरक्षा हालात दा जायजा लैता।



PM-Mumbai Visit

प्रधानमंत्री नरेन्द्र मोदी होर अज्ज मुंबई (महाराष्ट्र) दे दौरे पर जा'रदे न। प्रधानमंत्री होर गोरेगांव NESCO प्रदर्शनी केन्द्र च 29 ज्हार 4 सौ करोड़ रपे दी शिड़क, रेलवे ते बंदरगाहें कन्नै सरबंधी केई परियोजनाएं गी शुरू करगंन ते नीह पत्थर रकखगंन। संजा बेल्लै श्री मोदी होर भारतीय समाचार सेवा सचिवालय जांगन ते आईएनएस टॉवर दा उद्घाटन करगंन। प्रधानमंत्री होर 16 ज्हार 6 सौ करोड़ रपे दी लागत आली ठाणे बोरीवली सुरंग दा नीह पत्थर रकखगंन। इस सुरंग दी कुल लम्बाई 11.8 किलोमीटर होग ते एहदे कन्नै ठाणे ते बोरीवली बश्कार 12 किलोमीटर तोड़ी दी यात्रा घटी जाग ते घट्टोघट्ट 1 घेंटे समें दी बचत होग। प्रधानमंत्री होर गोरेगांव च 6 ज्हार 3 सौ करोड़ रपे दी लागत कन्नै बनने आली मुलुंद लिंक रोड परियोजना दा नीह पत्थर रकखगंन। श्री मोदी होर नमीं मुंबई च कल्याव यार्ड रिमोडलिंग ते गति शक्ति मॉडल कारगो टर्मिनल दा बी नीह पत्थर रकखगंन। प्रधानमंत्री मोदी होर लोकमान्य तिलक टर्मिनल च नमें प्लैटफार्म ते छत्रपति शिवाजी महाराज टर्मिनल स्टेशन च बिस्तरित प्लैटफार्म नंबर 10 ते 11 दा उद्घाटन कीता। हुन इनें रेलवे स्टेशनें उप्पर मतियां रेल गड्डियां आई सकदियां न।

प्रधानमंत्री होर मुख्मन्त्री युवा कार्य परिक्षण योजना गी शुरू करोआंगन जेहदी लागत तकरीबन 5 जहार 6 सौ करोड़ रपे ऐ। इस योजना तैहत 18 थमां 30 बरें दी बरेसू दे नोजवानें दी महारत च बाद्धा करियै ते उद्योगी कार्यशैली दा ज्ञान देइयै रोजगार दे मौके दित्ते जांगन। एहदे मगरा प्रधानमंत्री होर इंडियन न्यूजपेपर सोसायटी भारती समाचार पत्र समाज सचिवालय, बांद्रा-कुरला च आईएनएस टॉवरें दा उद्घाटन करगंन।

<><><><><><>

PM-Bimstec

प्रधानमंत्री नरेन्द्र मोदी होरें शांतिपूर्ण, समृद्ध बवस्थित ते सुरक्षत बिक्सटेक खेत्तर लेई भारत दी वचनबद्धता दी तस्दीक करदे होई आर्थिक ते समाजी विकास लेई इक इंजन दे रूपै च बिम्सटेक दी भूमका पर जोर पाया ऐ। बिम्सटेक दे सदस्य मुख्में दे विदेश मंत्रिएं कल नमीं दिल्ली च प्रधानमंत्री नरेन्द्र मोदी हुंदे कन्नै मलाटी कीती। प्रधानमंत्री होरें संपर्क, ऊर्जा, बपार, सेहत, राई-बाई, विज्ञान, सुरक्षा ते लोकें बश्कार आदान-प्रदान सनें केई खेत्तरें च इलाकाई सैहयोग गी मजबूत करने पर मंत्रिएं दे कन्नै सार्थक चर्चा कीतीं प्रधानमंत्री होरें अपने गवांड गी तरजीह देने सरबंधी नीति ते लुक ईस्ट नीति दे कन्नै-कन्नै खित्ते च सब्बने लेई सुरक्षा ते विकास दे महत्त्वै पर लोह पाई। प्रधानमंत्री होरें औंदे सितम्बर म्हीने होने आले बिम्सटेक शिखर सम्मेलन लेई थाईलैंड गी मुख्ख दा पूरा समर्थन जाहर कीता।

<><><><><><>

Savidhan Hatya Diwas

सरकार नै हर बरे 25 जून गी संविधान हत्या दिवस दे तौर पर मनाने दा फैसला लैता ऐ। 1975 च इस दिन साबका प्रधानमंत्री इंदिरा गांधी होरें देश च इमरजेंसी लाई ही। प्रधानमंत्री नरेन्द्र मोदी होरें आखेआ जे संविधान हत्या दिवस उनें घटनाएं दा चेता करोआग जिसलै भारत दे संविधान गी मिंदेआ गेआ हा। अपने इक सोशल मीडिया पोस्ट राएं श्री मोदी होरें आखेआ जे एह दिन हर उस व्यक्ति गी श्रद्धांजलि देने दा दिन ऐ, जिसलै आपातकाल दी ज्यादातियां गी सैहन कीता हा। उनें एह बी आखेआ जे कांग्रेस नै भारती इतिहास च इक काला अध्याय लिखेआ हा। इक सोशल मीडिया पोस्ट च केन्द्री गृहमन्त्री अमित शाह होरें कल आखेआ जे एह फैसला उनें लोकें गी सम्मान देने दे मकसद कन्ने लैता गेआ ऐ जिनें जालिम सरकार दे अत्याचार गी बर्दाश्त करदे होई देश च फही प्रजातंत्र स्थापत करने आस्तै बड़ी जद्दोजेहद कीती। उनें जोड़ेआ जे संविधान हत्या दिवस गी मनाने कन्नै नागरिकें दी आजादी ते देश च प्रजातंत्र दी रक्षा दे जज्बे दी ज्योति हर इक भारती दे अंदर जिंदा रौहग।

<><><><><><>

Advisor Education

उपराज्यपाल हुंदे सलाहकार राजीव राय भटनागर होरें स्कूली शिक्षा विभाग दी कारकरदगी दे कन्नो कन्नी बक्ख-बक्ख केन्द्री प्रायोजित स्कीमां जियां समग्र शिक्षा, पीएम पोषण, न्यू इंडिया लिटरेसी प्रोग्राम ते पीएम श्री दे जम्मू कश्मीर च लागू करने च हासल तरक्की दी समीक्षा कीती। बैठक दरान भटनागर होरें विभाग दी उपलब्धिएं ते शिक्षा च सुधारकरने आस्तै पेश आवा'रदिएं दिक्कतें, आधारभूत ढांचे दे विकास, शिक्षकें दी ट्रेनिंग ते जम्मू कश्मीर च समावेशी शिक्षा दे विकास बारे जानकारी लैती। उनें स्कूलें च बच्चें दे दाखले च बाद्धा, सिक्खने दे नतीजे बारे बी चर्चा कीती। उनें नमें शिक्षा कार्यक्रमें दे लागू करने च शिक्षा विभाग दी कोशशें ते शिक्षा दी गुणवत्ता दे बाद्धे आस्तै होआ'रदे कम्में दा बी आंकलन कीता।

<><><><><><>

CS-Independence

मुख्य सचिव अटल डुल्लू होरें कल जम्मू कश्मीर च स्वतंत्रता दिवस समारोह आस्तै चला'रदी तैआरिएं दा जायजा लैता। प्रशासन ते पुलस विभाग दे वरिष्ठ अधिकारिएं कन्नै इक बैठक दी अध्यक्षता करदे होई मुख्य सचिव होरें स्वतंत्रता दिवस दे खास मौके पेश होने आलिएं सांस्कृतिक प्रस्तुतिएं बारे पुच्छेआ। बैठक च दस्सेआ गेआ जे 6 छात्र दस्ते ते 1 महिला दस्ते सनें कुल 21 दस्ते जम्मू ते श्रीनगर च आयोजित होने आले 2 मुख्य कार्यक्रमें च हिस्सा लैंगन। एह्दे सरबंघे च 24 जुलाई गी फुल ड्रैस रिहर्सल ते दुइयां रिहर्सलां करोआइयां जांगन, जेह्दे कन्नै 77में स्वतंत्रता दिवस च अपनी पेशकश दी तैआरी आस्तै प्रतिभागिएं गी काफी समें थहोई जाग। मुख्य सचिव होरें खित्ता कमेटिएं तरफा बेहतररीन सांस्कृतिक प्रस्तुतियां चुनने पर जोर पाया जेह्दे च छात्रें गी मता शामिल कीता जा। उनें हर जिला संभाग प्रशासन गी अपने अपने क्षेत्र च पंचायत स्तर पर बी स्वतंत्रता ध्याड़े गी जोशो खरोश कन्नै मनाने लेई कार्यक्रम आयोजित करने आस्तै आखेआ।

<><><><><><>

Secretary APD

राई-बाई उत्पादन विभाग एपीडी दे प्रधान सचिव शैलेन्द्र कुमार होरें कल एपीडी दी बक्ख-बक्ख विकास परियोजनाएं दे हेठ चला'रदे कम्में दा जायजा लैता। बैठक च मता जोर पूरे पराते राई-बाई विकास कार्यक्रम एचएपीडी केपेक्स ते केन्द्रील प्रायोजित स्कीमें हेठ माली ते दुइएं हासल उपलब्धिएं दी समीक्षा पर जोर पाया। शैलेन्द्र कुमार होरें डेरी ते पोल्ट्री क्षेत्र दे बाद्धे विकास आस्तै इनें परियोजनाएं दे महत्व पर जोर पाया जिंदे कन्नै ग्राएं च रोजगार दे नमें मौके लोकें गी थहोंगन।

प्रधान सचिव होरें अधिकारिणं गी आखेआ जे ओह तैयशुदा समें अंदर लक्ष्य पूरा करने आस्तै ते उपलब्ध संसाधनें दे सेई इस्तेमाल गी पक्का करने आस्तै डटियै कम्म करन।

<><><><><><>

Amarnath Yatra

श्री अमरनाथ जी दी सलाना यात्रा आस्तै अज्ज 4 ज्हार 669 श्रद्धालुएं दा जत्था जम्मू दे भगवती नगर आले आधार शिविर थमां कश्मीर घाटी आस्तै रवाना होआ। कुल 183 गड्डिणं च सुआर होइयै श्रद्धालु अज्ज बडलै बेस कैप थमां शिवें दे दर्शनं आस्तै अग्गे बधे इंदे च 3 ज्हार 418 मर्द, 1 ज्हार 130 महिला, 23 बच्चे, 96 साधु ते 2 साध्वियां शामिल न। 1 ज्हार 630 श्रद्धालु बालटाल बेस कैप आस्तै बडलै मुंह न्हरे 3 बज्जियै 5 मिंट पर ते 3 ज्हार 39 श्रद्धालु पहलगाम बेस कैप आस्तै 4 बजे जम्मू थमां कश्मीर घाटी लेई रवाना होए।

<><><><><><>

Temple Reopening

दक्खनी कश्मीर दे अनंतनाग जिले च स्थित प्राचीन मंदरें चा इक गी 34एं बरें परेंत फही खेलेआ जा'रदा ऐ। घाटी च 1990 च बने दे माड़े हालात गी दिक्खदे होई एह मंदर बंद करी दित्ता गेआ हा। उआं हुन इलाके दी मकामी मुस्लिम आबादी दे सैहयोग कन्नै इस मंदर गी कल खोलेआ जा'रदा ऐ। देवी उमा भगवती हुंदी मूर्ति दे कन्नो कन्नी पंचमुखी हनुमान दजी हुंदी मूर्ति बी मंदर परिसर च स्थापत कीती जा'रदी ऐ। बरारी आंगन च स्थित मां उमा भगवती हुंदा एह मंदर इक प्राचीन धार्मिक स्थल ऐ जित्थें जम्मू कश्मीर दे बक्ख-बक्ख हिस्सें थमां श्रद्धालु मत्था टेकन औंदे हे। मां उमा भगवती कश्मीरी पंडत समुदाय दियां ईष्ट देवी न ते इस थाहरै पर एह हर बरे इक बड्डे धार्मिक कार्यक्रम दा सरिस्ता कीता जंदा हा जेहड़ा केई ध्याड़ें तगर चलदा हुंदा हा। कश्मीर घाटी दे हर इ हिस्से दे कन्नो कन्नी जम्मू संभाग थमां बी श्रद्धालु मां उमा भगवती हुंदे दरबार च मत्था टेकन जंदे हे।

<><><><><><>

GoC Visit Rajouri

फौज दी वाईट नाईट कोर दे जनरल आफिसर कमांडिंग लैफ्टिनेंट जनरल नवीन सचदेवा होरें कल राजौरी जिले दे कालाकोट इलाके दा दौरा लाइयै खित्ते च बने दे सुरक्षा हालात दा जायजा लैता।

अपने दौरे दरान जीओसी होरें खित्ते च चुनौतिपूर्ण हालात च बी अपनी जिम्मेदारिएं गी पूरे पेशेवराना तरीके कन्नै नभाने लेई जवानें दी सराहना कीती ते उंदे पर जोर पाया जे ओह अगगे बी इयै जज्बा बरकरार रखन। ध्यानजोग ऐ जे कालाकोट इलाका रियासी दे शिव खोड़ी इलाके कन्नै लगदा ऐ जित्थें आतंकवादिऐं जंदी 9 जून गी श्रद्धालुऐं दी बस पर गोलीबारी करियै 9 श्रद्धालुऐं दी हत्तेआ करी दित्ती ही। तोआई सुरक्षाबलें कल जम्मू दे चनाह् दरेया कन्ने लगदे गुड़ा पत्तन ते काना चक्क इलाकें च संदिग्ध नकलोहरकत बारे जानकारी थ्होने परैत उत्थें तपाशी अभियान चलाया। बलें गी हाई अलर्ट पर रखेआ गोदा ऐ ते लोकें गी गुजारश कीती गोदी ऐ जे ओह् संदिग्ध नकलो हरकत बारे जानकारी तुरत सांणी करन।

<><><><><><><>

Capex-Budget

सांबा दे जिला विकास काउंसल दे अध्यक्ष केशव शर्मा होरें 2024–25 आले माली ब'रे लेई जिला कैपेक्स बजट योजना गी मुक्कदा रूप देने ते मंजूर करने आस्तै कल सरबंधत घडेंद ी इक बैठक लाई। जिला विकास कमीशनर अभिषेक शर्मा हुंदे अलावा जिला ते सैक्टरल अफसरें सनें जिले दे सब्बनें ब्लाक विकास अधिकारिएं बी बैठक च हिस्सा लैता। इस मौके पर बक्ख-बक्ख खेत्तरें जिआं शिक्षा, युवा सेवाएं, खेड्डे, सेहत, पीएचई ते शौहरी मकामी निकार्ये कन्नै जुडे दे मामले पर चर्चा कीती गई। तोआई जिला विकास काउंसल रियासी दे प्रधान सराफ सिंह नाग होरें बी कल अपने जिले च इक बैठक लाइयै जिला कैपेक्स बजट तैहत विकास योजना गी मुक्कदा रूप दित्ता। जिले दे मुख् योजना अधिकारी होरें इक पॉवर प्वाइंट पेशकारी दे राएं बक्ख-बक्ख कम्में लेई रखे गोदे रपे-पैसे दा ब्यौरा पेश कीता। बैठक दरान जिले लेई 62 करोड़ 1 लक्ख 52 ज्हार रपे दा कैपेक्स बजट मंजूर कीता गेआ।

<><><><><><><>